



2016-mut anigaasanut inatsisissatut siunnersuut

(Aningaasaqarnermut Aatsitassanullu Naalakkersuisoq)

Siumup pingaartippaa inuiaqatigiinni aningaasaqarnikkut nammanneqarsinnaasumik ingerlatsinerup qulakkeersimajuarnissaa, aammalu anigaasanut inatsit ineriertortitsinermut qulakkeerisuussasoq nunap ataasisusup ineriertortinnissaanut.

2016-imni Aningaasanut inatsisissatut siunnersuut amigartooruteqarfiusussatut saqqummiunneqarpoq periarfissanik isaatitsiviusinnaasunik qulaajaanerup takutissagaa Siumut isumaqarpopoq, ukiut missingersuuteqarfiusut ilanngullugit anigaasanut inatsit illersorneqarsinnaasumik naammassisneqarnissaa anguniarlugu, tamatumungalu tamakkiisumik tunulequtaaggata Siumumiit erseqqissasavarpuit.

Siumumi ilisimalluarparput aningaasarsiornikkut annertuumik unammilligassaqaratta, taamaattumik aalisarnerup kisimi siunissami isumalluutit inissisimanera allangortissallugu pingaaruteqarpoq, taamaalilluni aatsitassarsiornikkut piaernerusumik ingerlatsilernissap tapersorsornissaa pisariaqarluuni. Taamatuttaaq takornariaqarneq pingaarutilimmik inissisimavoq tamatumungalu Naalakkersuisut kaammattussavavut kommuunit suleqatigilluarlugit pilersaarusrornerit ingerlanneqaqqullugit.

Sulissutigerutanik aningaasalersugassanik, ineriertornermilu atugarissaarnerup apparianginnisaanut tamatta akisussafeqarpugut taamaattumik aningaasalersuinermi siunissamut isigisumik illikartitsinissaq pingaaruteqartoq Siumumi isumaqarpugut. Nalunngilarput anguniarlulgulu suli annerusumik akisussaaffimmik tigusinissaq namminersornermit annerusumik akisussafeqalerusulluta, ilisimavarput aningaasalersornisaa nammineq isumagisussaallugu, namminersornej pillugu inatsimmi akisussaafit naalagaaffimmit suli tigunngisavut 30-it missaaniittut nammineq aamma aningaasassaqaartinniagassaraavut, isumaqatigiissutaanikkuummat taaku aningaasassaqaartinneqarneri malillugit nunatta tigujartuaassagai. Tamatuma saniatigut suliassaqarfinni Namminersorlutik Oqartussat akisussaaffini ukuni aggersuni aningaasalersugassat ilisimareerpavut, atugarissaarnerli maannarnit allangortinnagu ingerlatsineq kissaatigigutsigu allannguniarnerit annertuut aqqusaa-gassaraavut, isaatitsiffiusinnaasullu annerusumik sapiisuseqarfiginerusariaqarivut Siumumi isumaqaratta, Naalakkersuisut siunniussaat tamakkiisumik tapersorsorpavut.

Naluneqanngitsutut kommuunit aningaasaqarnikkut ajornartorsiornnerup killinganiipput, innuttaasunut sullissineq ajorseriarsimasoq nalunngilarput taamaattumik Naalakkersuisunut kommuunit nalilersuiffigineqarnerata aaqqissuusseqqinmissallu piaartumik nalilersorlugit qanoq kommuunit katitigaanerat allanguiffiussanersoq piaernerusumik sulissutigeqquarput. Sanaartornikkut killiffik eq-qarsaatigalugu siammasinnerusumik sanaartortoqarnissaa kaammattutigerusupparput, aamma isorliunerusuni nunaqarfinnilu, taamaattumik sanaartornermi aningaasaateqarfik misissoqquarput atuinissamullu Naalakkersuisut qanoq siunnersuuteqarsinnaanersut isumaliutigeqquallugu. Siumumi isumaqarpugut sanaartornermi aningaasaateqarfip misissuiffigalulgulu atorneqarnissaa pisariaqartikkippit taamaattumillu aqqtissat ilaattut tikkuvarumavarput, soorlutaaq oqaaseqaatini naligin-naasuni Naalakkersuisut 2016-imut oqaatigigaat, siuariartornissamut apeqquaapput sanaartornermi suliassat kiisalu aatsitassarsiornerup iluani ineriertortitsineq.

Kommuinut naligiissaareriaaseq ataatsimoortumillu tapiissuteqariaaseq nutaaq pillugu Naalakkersuisut periusissamik ujartuinerat Siumumiit naammagisimaarparput, aaqqiigallarsimanerlu kommuunit siunissami qanoq aaqqissugaanissannut attanniarneqarmat iluarisimaarparput, iliuusissani-llu suliaqarnermi kommuuneqarfitt kattuffiata suleqatigilluarneqarnissaa innersuupparput

Pisortanut akiitsut annikillisarnissaat.

Inuiaqatigiinni sutigut tamatigut aningaasanik atorsinnaasatsinnik amigaateqarnitta ersersippaa ullummikkut pisortanut akiitsunik akiliisitsiniaartarnermi periusissamik Naalakkersuisut ujartuinerat akileraartarnerup atugarissaarnerullu isumalioqatigiissitaata innersuussutigisimasaasa malitseqartinnerattut suliniut taasariaqarpoq. Oqaaseqaatini nalinginnaasuni, oqaatigineqarpoq Savalimmiuni periusineqartoq aallaavagineqartoq, paatsuungasoqaqqunagu periaaseq qanoq ittoq atorneqassanersoq ersarinnerusumik nassuiarneqarnissaa aammalu akiliisitsiniaartarnermi inatsimmut naapertuunissaa anguniarlugu Naalakkersuisut qanoq sutigullu allanngutissanik pisariaqarpat Saqqummiussileraarpat? Akileraartarnermi atugarissaarnermilu isumaliutissiisummi kiffaq konto pineqartoq eqqunniarneqarpa? Soorunami pisortanut akiitsunik ikilisaanissaq tunngaviatigut Siumumiit tapersersorparput, iliuusissatullu Naalakkersuisut pilersaarutigisaat atuisuusut paasisimassagaat pingaaruteqarmat erseqqissassavarput.

2008-mi akiliisitsiniaartarneq akileraartarnermilu aqtsineq allanngortinneqaramili suli naliliiffiusi-mangilaq. Tamanna 2012-ip naatsorsuutaasa kukkunersiorneqarneranni kukkunersuisusunit uparuarneqarpoq akiliisitsiniaartarneq allaffisornerup aningaasaliiffigineqarnerinnaatigut aaqqiivigineqarsinnaanngitsoq, taamaattumik akiliisitsiniaartarneq Naalakkersuisut eqaannerusumik pisariinnerusmillu aaqqissuuukkumallugu periarfissanik ujartuinerat Siumumi naammagisimaarparput, akiliisitsiniaartarnerullu akileraartarnermut iluarsaaqqimmermi nalilersuiffiusinnaanera isumaliutigeqqullugu.

Aningaasanut inatsisisamut Naalakkersuisut siunnersuutaanni ilinniartitaanermi piareersarfimmut aningaasaaliissutit 2016-mut ukiut missingersuusiorfiusut ilanngullugit takusinnaavarput annertusarneqassasoq, Siumumi paaserusupparput piareersarfinnik pisariaqartitsineq qaugu anniki-lliartulissasoq naatsorsuutigineqarnersoq? Tassami atuarnerminnik naammassinnigatik uniinnartatt periarfissinneqarnerat ajunngitsutut isigigaluaraaniluunniit meeqqat atuarfianni naammassinnissaaneq salliusariaqartoq Siumumi isumaqaratta, taamaattumillu meeqqat atuarfiat qanoq nukitorsarniarlugu Naalakkersuisut iliuusissaat Siumumiit paaserusuppavut.

Mittarfiit

Sanaartugassat annertuut assersuutiigalugu mittarfilioriternerit pilersaarutaasutut aallartisarniar-lugit aningaasanut inatsisisikkut misissueqqaarnernik aallartitsiniarneq iluarisimaarparput, Naalakkersuisunullu kaammattutigissavarput mittarfilornissat takornariaqarnikkullu pisariaqartumik sanaartugassat avataanit aningaasalersorneqarsinnaanerat periarfissatut misissorlugu sulissutigine-qassasoq.

Piffissami sivitsortumi oqallisaavoq Pilersaarut NEWPORT, Ilulissani kommuunip pilersitsisinnaaneranut avataaniit aningaasaaliisoqarluni, ilisimaneqartutut 2700 meterimik pilersitsinissaq aallaavagalugu kommuunimiit pilersaarusiortittisoqarsimavoq. Pilersaarusiap Namminersorlutik oqartussat Kommunilu suleqatigiinnerisigut naleqqussaqqillugu pilersinneqarsinnaanera misissuiffiqeqarsimansoq Siumumi paaserusupparput, ilisimavarput Naalakkersuisoq akisussaa-

suusoq kommuunimilu Borgmesteri kingusinnerusukkut atsioqatigiittut, tassani paaserusunnarpoq suna isumaqatigiissutaanersoq sunalu atsioqatigiinnerup imarineraa? Siumumiit soqutigilluin-narlugu paaserusupparput, suliassaqarfifit taamatut pingaaruteqartigisut pineqartillugit aaqqiagiin-ngissutaasinnaasut pinngitsoorniarlugin suleqatigiissutaasinnaasut erseqqissarneqartassasut, kingusinnerusukkut oqallinnerujussuit pisariaqanngitsumillu assortuussutaasut taamatut iliornikkut pinngitsoortitsinneqarsinnaammata. Mittarfinnik eqqartuinermut misissueeqqaarnernillu suliaqar-niarnermi ilanggullugit Qeqertarsuup, Qasigiannguit aammaluu Nanortaliup naannerusunik ujaraaqqanik qallikanik suluusalinnut mittarfiliorfiginissaasa ilanngunneqarnissaat kaammattuu-tigaarput.

Imeq

Taamatuttaaq imermik tunisassiorneq apeqqutigerusupparput, qeqertarsuarmi imermik tunisassi-orneq suliniut ersigunnaariartuinnarpoq naak akuersissutinik namminersorlutik oqartussat isuma-qatigiisuteqaraluartut, aamma kisermaasisumik tunisassiorsinnaanermut akuersissuteqartoq ilisimavarput piaartumik misissuiffigineqartariaqartoq Siumumi piumasarissavarput akuersissute-qarnermi siunertaq naamaginartumik ingerlasimagippat piaartumik aaqqinniarneqartariaqarpoq annerusumik inuviaqatigiinut minnerugitsumik qeqertarsuarmiunut malunnaatilimmik aaqqiivigi-neqarnissaa anguniartariaqalermat.

Isorliunerusuni nunaqarfinnilu sanaartorneq qaffassarneqartariaqarpoq.

Tamanit ilisimaneqarluarpoq illuliortiternermi isorliunerusuni nunaqarfinnilu nammineerluni illu-liortitsisarneq 2008-imili allangortinneqarmat sanaartorneq siusinnerusukkumut sanilliulluni kingu-ariarujussuaqqasoq, naak inissaaleqinikkut ajornartorsiutit appariaateqanngikkaluartut, tamanna aaqqiiviginiarlugu Siumumiit Naalakkersuisunut apeqqutigissavarput ukiuni qaninnerpaani namm-i-neerluni illuliortitsisarneq isorliunerusuni nunaqarfinnilu tamatumunngaluuniit assingusumik isu-maliutigineqannginnersoq, sanaqateqarluni illuliortitsisarneq isuma anguniagaasorlu tapersensor-naraluartoq isorliunerusuni nunaqarfinnilu kingunerluuteqarpoq aaqqiivigisariaqarlunilu.

Iilloqarfissuarnisuulli aningaaserivinnit isorliunerusuni nunaqarfinnilu periarfissagissaartigiso-qanngilaq illutaarniarnermimi isertitat tapiissuteqartarnermi tunngavigneqartarnerat aallaavigalugu nammineerlunilu illutaarsinnaanermut ullumikkut aaqqissuussineq angujuminaatsinneqarpoq, naak isorliunerusuni nunaqarfinnilu pisariaqartitsineq annertugaluartoq.

Taamatullu nunaqarfinni amerlasuuni naleqquttunik meeqqanut paaqqiniffiusinnaasut amigaa-taanersia qanoq annertutiginera misissuiffiusariaqalersoq Siumumi isumaqaratta Naalakkersuisunut kommuunit suleqatigalugit sukkanerusumik sulissuteqarnissaq kaammattuutigaarput, tusartuarpar-put suliffissuarni sulisussaaleqisoqartoq aamma nunaqarfinni sulisinnaasut ilaatigut paaqqiniffin-nik amigaateqarneq pissutigalugu sulisinnaasanngillat, taamaattumik kommuunit peqatigalugit tamanna aaqqiiviginiarlugu ilungersuunneqarnerusariaqartoq Siumumi isumaqarpugut.

Aalisarneq.

Aasaq manna, aalisarnikkut pisassaarunermik tunngaveqartumik aalisarnerup uneqattaanginnea maluginiagassat pingarutillit ilagaat, taamaattorli upernaaq sinerissami qanittumi aalisarnermik inuussutissarsiortut akuerineqarneq ajuleqqasut inatsisikkut periarfissiuunneqartut Siumumi malugi-niarparput, tamakkisumik aaqqiivigineqanngitsoq suli ilami aperisariaqarpungut, allaffissorner-suummuna ingerlatsineq sukkanerusumik aaqqiivigineqarsinnaagaluartoq ipitileraa? Tamanna ajor-poq piaartumik aaqqittariaqarpoq! Sooq kommuunit qanimat ulluinnarni sullisisuusut akisussaaf-fimmik tumineqarsinnaanngillat? Siumumi isumaqarpugut ukiuni qaninnerpaani akuersissutinik

piniarnermut aalisarnermullu kommuunit sullissinissaannik isumaqatiginiarneqartariaqartut taman-nalu Naalakkersuisunut kaammattutigaarput. Nalungilarput 2012-imi inatsit atuutilermetat suli aatsi-tassarsiortoqalersimangitsoq maannamut, aalisartut sineriassortut aaqqiivigeqqusullu suliffissaaleqisutut inissisimatippavut aallartinniarlutik utaqqiinnartut imminnut pilersorusukkaluartut, SIUMUT isumaqarpoq akimmisaartitsineq tassunga killeqartariaqarlersoq!

Ilangullugu sinerissap qanittuani umiatsiaararsorluni qaleralinniarnermi kvotalersuisoqarnissaq aqtsivinni pingasuuusuni atuutilissanersoq paaserusupparput, imaluuniit tamanna aalisarnermi inatsisip inaarutaasumik suliarineqarnerani ilanngulluni naatsorsuutigineqassanersoq, umiatsiaarar-sortut angallataatilitulli pisassiissutaasut qularnaveequtigisinnaalernissaat qaqugu atuutinnejaler-sinnaanersoq apeqqutigisarpaat.

Angallatitigummi umiatsiaararsorneq eqqarsaatigalugu pisassanik qularnaveequteqalersinnaaneq aningaaseriviit aaqqutigalugit nutarterisinnaaneq periarfissanut ilaaliassamat anigaaserivitsigut attartorneq isorliunerusuni nunaqarfinnilu ajornaatsuunnaangilaq, taamaattumillu pissassiisoqar-talissappat angallataatilittut qularnaveequtaasinnaasunngorlugit aaqqiivigineqarsinnaanerat qaqugu naatsorsuutigineqarsinnaanersoq pilersaarutaanersorlu paassisallugu pingaaruteqarpoq.

Aalisarneq sinerissap qanittuani pisassaarunneq tunngavigalugu uneqattaartumik inissisima-nngikkaluartoq taamaattoq suliffissuit nunami ulikkaarlutik allatulluuniit uneqattaarnerat qanoq aaqqiiviginiarlugu Naalakkersuisut pilersaaruteqarnersut paassisallugu soqutiginarluinnartuuvoq.

Ilaatigut sulisussaaaleqineq naak nunatsinni suliffissaaleqisut 3000-init ikinnerunngikkaluartut suliffissuit sulisussaaaleqinerannut suut pissutaanersut? Qulaajarneqartariaqalersoq SIUMUT isumaqarpoq. Periarfissanik aaqqiissutaasinnaasunillu ujartuinermut ilanngullugu Naalakkersuisunut isumaliutigeqquarput, tunissiornermi ataatsimiitsitalianik pilersitsinissaq periarfissat ilaattut isumaliutigeqquallugu, soorlu siusinnerusukkut nunami suliffissuit pillugit ataatsimiititaliaq inatsisitigut pisussaaffusoq aallaavigalugu pilersinneqartarmat, kommuunimit najukkami KNAPK-ip immikkoortortaqarfianit aammalu SIK-mit suliffissuarmillu sinniisuuffigineqartoq, taamaa-liornikkut upalungaarsimanissaq sulisoqarnikkut ilanngulluni sulissutigineqarsinnaaleqqullugu.

Ilanngullugu akileraartarnikkut aaqqissuusseqqinnermut ilaatillugu sulinermut ilanngaatiq eqqunnissaa Siumumiit misissoqqvarput, sulineq suliffissuarni sulerulunnartuuvoq taamaattumik immikkut iliuuseqarluni kajungernartuunissaa Siumup pingaartilluinnarpaa, minnerunngitsumik aalisakkanut qeritsiviit ulikkaartoortarnerat aalisarnerup aallarteruttorfiani nakutigisariaqartoq Siumut isumaqarpoq, tamatumani usinik assartuinermik kisermaassilluni ingerlatsisuuosoq RAL suliffissuarnik ingerlatsisunik suleqateqaqqissaartariaqartoq kaammattutigerusupparput, aalisar-nikkut uneqattaanngitsumik ingerlatsinissaq pingaarutilerujussuuvoq pingaartumik aalisarneq kisimi nunatsinni annertunerpamik isaatitsissutaasutut inissisimatillugu, suliffissuarnilu sulissussaa-leqisarneq aaqqinniarlugu susassaqartut tamarmik aamma aningaasatigut pisortanit ikorsiis-sutaasartut ilanngullugit nalilersorneqartariaqartut eqqarsaatigeqquallugu Naalakkersuisunut kaammattutigaarput, taamaattumillu Siumumi pingaartipparput sulilersitsiniarnerup anguniar-nerani isumaginninikkut periarfissaritinneqartut nalilersuinermi ilaatinmissaat.

Ataasiakkaanut apeqqusiinerit:

Konto pingearneq: **51.01.07 Aalisartut Piniartullu siunnersortinit sullinneqarnerat**

Namminersorlutik oqartussanut nuunniarneqarpoq allaffissornikkut sipaarutissat eqqarsaatigineqar-lutik, Siumumiit apeqqutigissavarput sullinneqartut eqqarsaatigalugit ataatsimut isiginnilluni sullis-sineq pitsasuussasoq qanoq qulaakkeerniarlugu Naalakkersuisut pilersaaruteqarnersut, ilisima-

varput sinerissami siunnersorneqarnissaq pisariaqartinnejartorujussusoq, pingaartumik avannaani qaleralinniat eqqarsaatigalugit, qanoq sullissineq pitsaanerulersinneqas sava Namminersorlutik oqartussanut sullissineq nuunneqarpat? Maanmamummi KNAPK-mut angusaqarnissamut isumaqatigiissusiaq malillugu sulineq ingerlanneqartoq, ilisimagatsigu allanguineremi suut pitsaanerulersinermik kinguneqassasut naatsorsuutigineqarnersoq aamma qanoq pilersaaruteqartoqarnersoq nassuaammik piumasaqarpugut, Siumumi isumaqaratta isumaqatigiissuteqarlumi ingerlatsineq naammaginngikkaanni aningaasatigut atugassarititaasutigut piumasaqaataasut pitsangorsaneqarpata aatsaat pitsaanerulersitsisoqarsinnaasoq. Siumut isumaqarpoq akisussaaffinnik eqiterineq kommunerujussuanngortitsinermi siunertanut akerliusq aqqutissaanngitsorlu suleqatigiinnerup maannarnit nukittunerulernissaannut.

Taamatullu konto pingaernermei **50.06.50 Aalisarnermut aningaasaliissutinut immikkoortitat** 2016-imut 5 mio. Kr.-inik ikilisinneqarnissaat siunnersuutaavoq, 2015-imi atunngitsuukkanik qanoq amerlatigisut 2016-imut nuunneqassanersut paassisallugu pingaaruteqarpoq tamatumunngalu Naalakkersuisut akissuteqarnissaat atunngitsuukkanik pissuteqartumik illersorneqarsinnaersoq Siumumiit paaserusupparput.

Konto pingaerneq **51.01.04 Aallarteqqinnissamut tapiissuteqartarneq**.

Naalakkersuisut siunnersuutigaat periarfissaq peerneqassasoq nassuiarneqanngilaq sooq? Kontomi pineqartumi aningaasat immikkoortitat amerlasoorsuunngikkaluartut taamaattoq pisariaqalertartoq ilisimavarput, aallarteqqinnissamut inuussutissarsiuuteqartut periarfissaminnik atusariaqartarmata, pingaartumik isorliunerusuni piniarnerinnarmik ingerlataqartunut pinngortitap nukingisa angallatitigut ajutoortitsisinnaasnerat qiviaannarutsigu, Siumut isumaqarpoq periarfissaqarnissaq pingaaruteqartoq paaserusunnarporli atorunnaarsitsinissamut tungavilersuutaasut, nassuiarneqanngimata, sooq atorunnaarsinniarneqarnersoq, atorneqartanginnera tunngaviusimappat pitsaanerusumilluunit periarfissaqarnera allatigut aqqutissiuunneqarsinnaappat aninngaasanut inatsisip suliarneqarnerani Siumumi nalilersorumavarput.

Aningaasanut inatsisikkut erseqqissumik akitsuusersuinissaq sinerissamut qanittumi aalisarneq eqqarsaatigalugu ersernerluttutut Siumumi isigigatsigu, paaserusupparputtaaq aalisakkat akitsuusersorneqarnissaat qanoq Naalakkersuisut takorloorneraat? Tunitsivinnit suliarineqaratik pingaartumik qalerallit tonserpassuit nunatta avataanut anninneqartartut akitsuuserneqassappata, tamanna pissussissamissortutut Siumumi isigaarput, inuiaqatigiimmi pisuussutiminnik pissarsinissaat pigaaruteqamat aningaasalersugassat eqqarsaatigalugit.

Raajat

Ilisimaneqartutut Raajartassat ikilisinneqarnikuupput, nunatta avannaani siusinnerusukkut misile-raaffiusumi peqassuseq aallaavigalugu pisassiisutaasut amerlisinnejarnissaanut tungavissaqartoqalersimanersoq SIUMUMI paaserusupparput! Raajartassat ukiuni aggersuni illersorneqarsinnaasumik amerlisinnejarnissaanerat eqqarsaatigalugu. Naluneqanngitsutut Raajat MSC-mik meqqilerneqarnikuupput sumiiffinni nutaani misileraanermi qaffaasinnaaneq periarfissaqartoq paasineqarsi-mappat pisassiissutit qaffassinnaanerannut aporfait suuppat? Aamma taakkununga aaqqiiniarluni Naalakkeersuisut qanoq suliniuteqarniarpit?

Avaleraasartoorniarneq

Pisassiissutaasut eqqarsaatigalugit paaserusupparput avaleraasartuut ukioq manna qanoq amerlatigisut pisarineqarnersut akitsuutitigummi sunniuteqartussaapput taamaattumik paasisutissiissutigineqarnissaat kaammattutigaarput, akitsuutitigullu isumalluutaanerat annikillisinneqarnissaanut pissu-

tissaqaletsitsisimappata, nalilersueqataarusuppugut. Nalunngilarput pinngortitaq aqussinnaanatigu naak silaannaap allanngoriartornera sarfarlu kissartoq ukuni atukkatsinni nalaakkaluarlutigu pisuussutinut tamatigut iluaqtigisinnaangikkutigu pisuussutit sarfap kissartup nassatarisaanik isumallutiginerat annikillisissallngu aamma pissusissamisuussaaq, allatut oqaatigis sagaanni sarfap kissartup pisuussutit aningaasarsiutaasinnaasut nutaat aalaakkaasumik imartatsinni aalisarneqarsinmaatissagai isumalluarpallaarsimavugut? Aningaasatigummi sumiuteqartussamik aaqqissuussinermi mianersornissaq pingaaruteqarpoq, tamatumalu paaseqatigiissutiginissaa pingaaruteqarmat oqalliseqataaffigiumavarput.

Nunalerineq

Siumumi isumaqarpugut nunalerineq immikkut siuarsagassaasoq, soorluttaaq nunalerineq pillugu ataatsimiititaliarsuup isumaliutissiissutaani tamanna pingaartinneqartoq. Taamaatumik nunalerinermi ingerlatsineq Kujataani ingerlanneqarmat allaffisornikkut tamakkiisumik sullinnejartut tikillugit kommuuni suleqatigalugu ingerlatsinerup nuunneqarsinnaanera Siumumiit Naalakkersuisunut isumaliutigeqquullugu kaammattuutigaarput, Siumut isumaqarpoq sullinnejartut tikillugit kommuuni kujalleq suleqatigalugu periarfissaqartoq, aamma Siumup naleqquttutut isigaa aksusaaffinnik siammaanissamik kommuunit aaqqissugaammata kommuuni kujalliuip isumaqatigiissuteqarnikkut allaffisornermi suleqatiginissaa kaammattuuti gaarput.

Angallanneq

Ukiuni arlalinngortuni angallanneq eqqarsaatigalugu kiffartuussinermut isumaqatigiissut kinguartineqaqattaarpoq, Siumumi isumaqarpugut aaqqiivigisariaqalersoq. Aaqqiigallartarnerit pisimapput, Siumumi isumaqarpugut tamatuma killissani tikittariaqaraa, suliffeqarfitt isumaqatigiissuteqarfiginiarnejartut siunissami angallassinermut pilersaarusrorlutilu nutarterinissaannut periarfissillugit, nalunngilarput tamanna ajornaatsuinnaanngitsoq, angallannermi eqqartorneqaleraangat nunap immikkoortui tamarmik pitsaanerusumik sullinnejarnissamik piumasaqaateqartarput, eqqaamassavarput aningaasatigut pisinnaasarput sinnerlugu iliuuseqassagutta tamanna akeqarmat, taamaattorli isumaqatigiissuteqarniarnerit aningaasatigut sinaakkusiussat amerlassusaat aallaavigalugu ingerlannejartarmata isumaqatigiissuteqarnissarli pingaaruteqarluinnartutut Siumup isigaa. Isumaqatigiissuteqarfigineqartut atortutigut sullissinikkullu naleqqussaallutilu aaqqissuussisinnaanerat periarfissinneqartariaqarmat.

Utoqqalinersianik iluarsartuuseqqinneq,

Naalakkersuisut utoqqalinersiaqarnermi iluarsartuuseqqinissamik anguniagaqarnerat inuviaqatigiinni aaqqissusseqqinnerit pingaarutillit ilagigaat Siumut isumaqarpoq, taamaatumillu naalakkersuisut inatsisissamik nutaamik saqqummiusippata nalilersuinerter peqataalluarnissarput qilanaaraarpuit.

Inuviaqatigiinni sulisinnaasut ikiliartorput, massa utoqqaat inuuneqqortusiartornerat nuannaurtissaasoq atorluarlugu utoqqaat peqqissut sulisinnaasullu suliffeqartuaannartarnissaat periarfissutigisarutigu ajornartusiutaalersoq aamma annikillisassagaluarparput.

Utooqalineq nuannersuussasoq Siumumi isumaqarpugut, naleqquttumik isumagineqartarnissaq pisariaqarpoq, pisariaqarfiani ulloq unnuarlu paaqqinnittarfimmittarnissaq upernaaq 2015-mut anigaasaqarnikkut nalunaarusiaq suliarineqarmat piumasarereerparput, utoqqaat najugaqatigiiffeqartarnerat ataqtigisagaasumik pilersaarusrorneqartariaqartoq aamma piumasaraarpuit, siunissami utoqqaat paaqqinnittarfefqarnikkut sullinnejarnerat ataqtigisaaqluarneqartariaqartoq aamma nalunaarusiatigut erseqqissarneqartareerpoq. Taamatuttaaq utoqqaat namminerisaminnik ineqartarnerisa ineqarunserisalu mianerinissaa pingaaruteqarluinnartutut Siumumiit isigaarpuit,

taamaattumik utoqqaat peqqissut ajornannngippat angerlarsimaffimmi nniiginnartarnmissaat siumumiit alajangiusimavarput.

Utoqqalinersiaqalersinnaanermi ukiut qaffanneqarnissaat 2017-imi 66-nut 2021-milu 67-inut aalajagiifigissallungu unamminartuuvoq, nunattali anigaasaqarniarnera eqqarsaatigalugu aaqqis-suuseqqinnernut allanut peqatigitillungu aaqqiiviginissaa allaqqussinnaagilaq, atugarissaarnikkut maannarnit appariaateqangitsumik siunissamut aaqqissusisoqassappat tamanna aalajagiifi-sariaqartoq Siumut isumaqarpoq. Suliassaqarfitt tamaasa qiviassagaani allanguinissat saneqqunneqarsinnaagillat, minnerugitsumik anigaasarsiorfiusinnaasut isaatisiviusinnaasullu pimoorullungit ingerlannissaat Nunatsinni tamnnut annertuumik akisussaafiliipput pisussaaf-filiillutillu.

Aaqissuuseqqinnissat Naalakkersuisooqatigiinnit Naamassiniarneqartussat

Ukiuni tulliuttuni inuiaqatigiinni pingaaruteqarluinnartut aaqqissusseqqinnerit arlallit Naalakkersuisooqatigiit ingerlattussaavagut. Ilanniartitaanikkut aaqqissusseqqinneq, pisortat sullissiviini aaqqissuuseqqinneq, minnerunngitsumik akileraartarnikkut Ineqarnikkullu aaqissusseqqinnerit. Tamakku suliassavut annertuut tamaasa soorunami ataqatigiissaarluarlugit nalilersoqqissaarlugillu suliarisariaqarpavut, taamatullu aamma Naalagaaffimmiit angerlaallugit tigusassavut eqqaamasariaqarlutigit. Eqaamajuartiguli aaqqissussinerit suungaluarpataluunniit tamatigut siunertariuartussaagatsigu Nunatta kiffaanngissuseqarfialluni imminut napatilernissaa, kikkut tamarmik atorfissaqartinneqarlutik ilinniartitaanikkut periarfissaqarnissaat, minnerunngitsumik nunatta tamanut toqqisisimanartuulluni minguitsuullunilu najoruminartuunissaa tamatta suleqataaffigisariaqarpapput.

Akitsuusersuisarneq

Anigaasanut inatsisisissami 2016-mut akitsuutitigut isertikkumaakkat **Konto pigaarneq:24.13.50 akileraartarnermi akitsusiisarnermilu isertitaqarnerulernissamut sillimmatit** saqqummiun-neqarmalli oqallisaqaaq, tamanna ajungilaq isummersuutigineqarneranili inernileereertutut oqallisaanera kukkuneruvoq isumaqatigiinniutissaavoq aamma allatut aaqqiissuteqarsinnaanissamut periarfissinneqarpugut allatigut aningasat pissarsiariniarneqarsinnaanerat eqqarsaatigalungu, tamannalu Siumup qujaruppa, Siumumi tungaviusumik toqqaannaq inuit kaasarfiinit akitsuutitigut aallernissaq periarfissatut siullertut isiginngisaannarpapput. Taamaattumik aningaasanut inatsisisatut siunnersuutaasup amingartooruteqartinnaveersaarnissaanna piinnarlugu ukiuni aggersuni innuttaasut atungarliortitaanissaannut aqqutissiuusseqaanavianngilagut.

Qummoorortartut akitsuutitigut qaffaaviginiarneqarnerat ajoriffissaqartingilarput avatagiisirut migutsisisuunerat ilisimagatsigu,

Aamma Siumut isumaqarpoq imeq avataanit tikisinneqartartoq akitsuusersuinikkut killilersimaarne-qassappat periarfissatut isigigattingu, tamannalu Naalakkersuisunut periarfissatut misissoquarput, imermik tunisassiat avataaneersut akitsuuserlugit nammieq nunatsinni imermik tunisassiornikkut inerisaanissaq annerusumik periarfissinneqartariaqartoq Siumumi isumaqaratta,

Neqinik sukkulinnillu akitsuusiinissaq Siumumiit isumaqatiginngilarput.

Taamatullu Uuliap akikillissutigisinnaasaa pingitsoortillungu akitsuutitut isertikkumaakkanut matussutaaginnartussanngorlugu aaqqiinissaq isumaqatiginngilluinnarpapput! Naatsumik oqaatigaalugu nunarsuarmi uuliap akinga qaffariarsimatinnagu Nunatsinni uuliap akinganik

qaffaasoqartarnera isumaqatigingilluinnarpalput, Kalaallit Nunatsinni uuliap akinga tamatumalu akitsuusersorneqartarnera tamakkiisumik nunatta soqutigisaanit pisassaaq, KNI-Pilersuisup soqutigisaanit pinnani.

Taamaatumillu Siumumiit 96,9 mio. Kr. makkunuunatingut matussuserneqarsinnaanissaat isumaqatiginniutigerus uppavut:

- Qalerallit suliarineqaratik Fabrikkiniit avataanut annissorneqartut akitsuusersnerisigut,
- Aappaagumut raajartassatut pisassiissutaasussat qaffaataasa akitsuutaasigut ertsertikkumaa-gassatigut.
- Iermik avataaniit eqqussukkat akitsuusersorneqarnerisigut.

Qulaani akitsuutitigut ertsertikkumakkat saniisigut Namminersorlutik oqartussat Pisiffik A/S-imi piginneqataassutai 14% missaaniittut tunineqassasut Naalakkersuisunut inassutigaarput, anigaasalli piginneqataasutit tunineqarnerisigut ertertinneqartut nunatta pissarititaanik inuussutissarsiutitigut siuarsaanisanut anigaasaliutissatut eqqanaarneqassasut innersuuparput, taamaaliornikkut siunissami aningaasat sulisillungit inerisaanermut atorneqaqqullungit.

Ilangullugu KNI-Pilersuisoq Illoqarfintti unammillerfiusuni pisiniarfinttik pilersitsisinnaanissamut ammaanneqassasoq inassutigaarput, siunissami KNI-Pilersuisumut kiffartuussinermut isumaqatigiissutaasartunut aningaasaliissutaasartut peeriartuaaneqarnissaat anguneqarsinnaalissammatt.

Siumumiit saqqumiussavut Inatsisartumi isumaqatigiisutaasinnaappata aamma atuisunit malugine-qarsinnaasumik uuliap akiata apparnissaa aqutissiuuseqataaffigisinnavaarpot, akitsusiinissallu siunnersuutigineqartut toqqaannartumik innuttaasut aningaasaqarnerannik eqquisinnaasut ilaasa pinngitsoortinnerannik tamanna aamma kinguneqarsinnaalissagaluartoq Siumumiit isumaqarpugut.

Nunatsinni ineriertortitsiniarnermi inuiaqatigii atugarissaarnikkut appariaateqarfiunngitsumik ingerlaqqinnissaat Siumup pigaaruteqarluinnartutut isigaa, taamaattumik naalakkersuisut anigaasanut inatsisisamik saqqummiusaannut qujalluta suleqataalluarnissarput naatsorsuutigine-qassasoq oqaatigissavarput.

Taamatut oqaaseqarluta, 2016-mut Inatsisaretut aningaasanut inatsisisaaattut siunnersuutip matumuunalu saqqummiussavut ilanngullugit Aningaasaqarnermut Akileraartarnermullu Ataatsimiittialami suliareqqissaarneqarnissaat innersuusutigaarput.

Jens Immanuelsen
Siumut